

REGIONAL NEWS UNIT  
ALL INDIA RADIO, AGARTALA  
Date: 16-05-2024  
Time: 07:55-08:05 PM Hrs  
BENGALI EVENING BULLETIN

---

Headlines :

(১) রাজ্যে আসন্ন ত্রিস্তরীয় পঞ্চায়েত নির্বাচনের জন্য ভোট কেন্দ্রের খসড়া তালিকা প্রকাশ করা হবে আগামী ২০শে মে ।

(২) রাজ্য সরকার রাষ্ট্রিয় বাল স্বাস্থ্য কর্মসূচীতে শিশুদের জন্মগত বিভিন্ন রোগ চিকিৎসায় রাজ্যের ও বহিরাজ্যের বেশ কিছু হাসপাতাল ও চিকিৎসা কেন্দ্রকে নথীভুক্ত করেছে ।

(৩) অষ্টাদশ লোকসভা নির্বাচনের পঞ্চম পর্বের জন্য বিভিন্ন দলের শীর্ষ নেতৃবৃন্দ পুরোদমে নির্বাচনী প্রচারে যোগ দিয়েছেন ।

(৪) সদরের আন্তঃ স্কুল ক্রিকেট প্রতিযোগিতার আজ অনুষ্ঠিত চারটি খেলায় আনন্দনগর স্কুল, নন্দননগর স্কুল, হেনরি ডিরোজিও স্কুল ও প্রগতি বিদ্যাভবন জয়লাভ করেছে ।

\*\*\*\*\*

All Party Meeting :

রাজ্যে আসন্ন ত্রিস্তরীয় পঞ্চায়েত নির্বাচনের জন্য ভোট কেন্দ্রের খসড়া তালিকা প্রকাশ করা হবে আগামী ২০শে মে। ঐদিন থেকেই খসড়া তালিকার উপর দাবি ও আপত্তি গ্রহণ করা হবে। দাবি ও আপত্তি সমূহের নিষ্পত্তির কাজ শেষ হবে আগামী ৩০শে মে। ভোট কেন্দ্রে চূড়ান্ত তালিকা প্রকাশ করা হবে আগামী তেসরা জুন। উল্লেখ্য, পঞ্চায়েত নির্বাচনের জন্য খসড়া ভোটার তালিকা প্রকাশ করা হবে আগামী ৬ই জুন। আমাদের ঊনকোটি জেলার সংবাদদাতা অনুপম ভট্টাচার্য জানিয়েছেন, আসন্ন ত্রিস্তরীয় পঞ্চায়েত নির্বাচনকে সামনে রেখে আজ ঊনকোটি জেলার গৌরনগর ব্লক কার্যালয়ে বিভিন্ন রাজনৈতিক দলের প্রতিনিধিদের নিয়ে এক সর্বদলীয় বৈঠক অনুষ্ঠিত হয়। এতে সভাপতিত্ব করেন, নির্বাচন নিবন্ধন আধিকারিক তথা ব্লকের B.D.O সোমেশ বনিক। বৈঠকে সার্বিক প্রক্রিয়া সম্পন্ন করতে সংশ্লিষ্ট সকলের সহযোগিতা কামনা করা হয়।

\*\*\*\*\*

#### **Rastriya Baal Sasthya Yojna :**

রাজ্য সরকার রাষ্ট্রীয় বাল স্বাস্থ্য কর্মসূচীতে শিশুদের জন্মগত বিভিন্ন রোগ চিকিৎসায় রাজ্যের ও বহিরাজ্যের বেশ কিছু হাসপাতাল ও চিকিৎসা কেন্দ্রকে নথীভুক্ত করেছে। আজ মহাকরণে এন এইচ এম এবং স্বাস্থ্য দপ্তরের উদ্যোগে এক যৌথ সাংবাদিক সম্মেলনে একথা জানান এন এইচ এম এর মিশন অধিকর্তা রাজীব দত্ত। তিনি জানান, ১৮ বছর বয়স পর্যন্ত শিশুদের জন্মগত হৃদরোগ চিকিৎসার জন্য আগরতলার এ জি এম সি এবং জি বি পি হাসপাতাল, চেন্নাইয়ের এপেলো চিলড্রেন হাসপাতাল, কলকাতার মেডিকো সুপার স্পেশিয়ালিটি হাসপাতাল,

ও মনিপুরের শিজা হাসপাতাল ও রিসার্চ সেন্টার নথিভুক্ত করা হয়েছে। এছাড়া শিশুদের ঠোট কাটা, তালু কাটা ইত্যাদি রোগের চিকিৎসার জন্য গুয়াহাটীর মিশন স্মাইল ও আগরতলার টি এম সি হাসপাতালকে নথিভুক্ত করা হয়েছে। কানে শোনার কোনো সমস্যার জন্য আগরতলার আই এল এস হাসপাতাল, বাঁকা পা চিকিৎসার জন্য মুম্বাইয়ের অনুক্ষা ফাউন্ডেশন হাসপাতালকে নথিভুক্ত করা হয়েছে। সাংবাদিক সম্মেলনে স্বাস্থ্য অধিকর্তা ডা: সঞ্জীব দেববর্মা, রাষ্ট্রীয় বাল স্বাস্থ্য কর্মসূচীর রাজ্য নোডাল অফিসার ডা: সঞ্জয় রুদ্র পাল বক্তব্য রাখেন।

\*\*\*\*\*

#### **Bachar bachao examination :**

নবম এবং একাদশ শ্রেণীতে পড়ুয়াদের জন্য বছর বাঁচাও পরীক্ষা শুরু হবে আগামী ১১ জুন থেকে। চলবে ২২ জুন পর্যন্ত। বিদ্যালয় শিক্ষা দপ্তরের অধিকর্তা নৃপেন্দ্র চন্দ্র শর্মা এক বিজ্ঞপ্তিতে জানিয়েছেন, ত্রিপুরা মধ্যশিক্ষা পর্ষদ আওতাভুক্ত সরকারি এবং সরকার অধিগৃহীত স্কুলগুলিতে বছর বাঁচাও পরীক্ষা হবে।

\*\*\*\*\*

#### **D.N.A Club :**

কৈলাশহরের কাউলীকুড়াস্থিত বৈদ্যনাথ মজুমদার স্মৃতি দ্বাদশ শ্রেণি বিদ্যালয়ে আজ উদ্বোধন হ'লো ডিপার্টমেন্ট অব বায়ো-টেকনোলজি ন্যাচারেল রিসোর্সেস এওয়ারনেস ক্লাব বা D.N.A ক্লাবের। পাশাপাশি এই বিদ্যালয়ে আজ থেকে সংযোজিত হয়েছে জাতীয় সেবা প্রকল্প ইউনিটের। এই কর্মসূচির আনুষ্ঠানিক উদ্বোধন

করেন, যুব বিষয়ক ও ক্রীড়া দপ্তরের সহ-অধিকর্তা অমিত কুমার যাদব। অনুষ্ঠানে বক্তব্য রাখেন, বিদ্যালয়ের অধ্যক্ষ বকুল দাস। এদিন বিদ্যালয়ের বার্ষিক পুরস্কার বিতরণী অনুষ্ঠান অনুষ্ঠিত হয়।

\*\*\*\*\*

### **Suspend-Jail :**

কেন্দ্রীয় কারাগার থেকে যাবজ্জীবন সাজা প্রাপ্ত কয়েদি স্বর্ন কুমার ত্রিপুরার পালিয়ে যাওয়ার ঘটনায় কর্তব্যে অবহেলার দায়ে আজ কেন্দ্রীয় কারাগারের সাব জেলার দেবশীষ শীলকে সাময়িক বরখাস্ত করা হয়েছে। এর আগে এই ঘটনায় কেন্দ্রীয় কারাগারের দুই কর্মীকে গ্রেফতার করা হয়। বিশালগড় থানার ও.সি রানা চ্যাটার্জী আজ জানিয়েছেন, কেন্দ্রীয় কারাগারে সার্বিক নিরাপত্তা ব্যবস্থা খতিয়ে দেখা হচ্ছে।

\*\*\*\*\*

### **Update Akashvani :**

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তারিত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম এবং নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

\*\*\*\*\*

### **Election :**

অষ্টাদশ লোকসভা নির্বাচনের পঞ্চম পর্বের জন্য বিভিন্ন দলের শীর্ষ নেতৃবৃন্দ পুরোদমে নির্বাচনী প্রচারে যোগ দিয়েছেন। এই পর্বের প্রচার পর্ব আগামী শনিবার শেষ হবে এবং এই মাসের তারিখে তারিখে ভোটগ্রহণ অনুষ্ঠিত হবে।

প্রধানমন্ত্রী এবং বরিষ্ঠ বিজেপি নেতা নরেন্দ্র মোদি আজ বলেছেন যে CAA হল মোদী সরকারের প্রতিশ্রুতির একটি জ্বলন্ত উদাহরণ এবং এটা স্পষ্ট যে বিজেপি সরকার যে প্রতিশ্রুতি দেয় তা পূরণ করে। উত্তরপ্রদেশের জৌনপুর জেলায় এক নির্বাচনী জনসভায় ভাষণ দিচ্ছিলেন তিনি। তিনি বলেন যে আগে উন্নয়ন দিল্লি এবং মুম্বাইয়ের মতো বড় শহরগুলিতে সীমাবদ্ধ ছিল তবে এখন অযোধ্যা এবং কাশীর মতো ধর্মীয় স্থানগুলিতেও প্রচুর উন্নয়ন হয়েছে।

এর আগে, আজমগড় জেলার লালগঞ্জ এলাকায় একটি রাজনৈতিক সমাবেশে ভাষণ দিতে গিয়ে প্রধানমন্ত্রী সমাজবাদী পার্টি এবং কংগ্রেসের বিরুদ্ধে স্বজনপ্রীতি ও দুর্নীতির অভিযোগ করেন। তিনি আজ ভাদোহি এবং প্রতাপগড়ে জনসমাবেশ করেন। আগামীকাল তিনি বারাবাঙ্কি, ফতেপুর এবং হামিরপুর নির্বাচনী এলাকায় আরও তিনটি জনসভায় ভাষণ দেবেন।

অন্যদিকে কংগ্রেসের সাধারণ সম্পাদক প্রিয়াঙ্কা গান্ধী ভাদ্রা রায়বেরেলিতে নির্বাচনী প্রচারে গিয়ে বিজেপির বিরুদ্ধে অভিযোগ আনেন। সমাজবাদী পার্টির প্রধান অখিলেশ যাদবও বান্দায় বিজেপির বিরুদ্ধে দুর্নীতির অভিযোগ করেন।

\*\*\*\*\*

**Medicine Prices Slashed :**

ডায়াবেটিস, হার্ট এবং লিভারের রোগের মতো রোগের চিকিৎসায় ব্যবহৃত বেশ কিছু ওষুধের দাম কমিয়েছে সরকার। জনসাধারণ যাতে সাশ্রয়ী মূল্যে প্রয়োজনীয় ঔষধ সংগ্রহ করতে পারেন, সেজন্য জাতীয় ফার্মাসিউটিক্যাল প্রাইসিং অথরিটি এনপিপিএ-র সভায় এই সিদ্ধান্ত নেওয়া হয়। ঔষধ কোম্পানিগুলোকে বিভিন্ন ওষুধের মূল্য হ্রাসের তথ্য অবিলম্বে ডিলার ও মজুতদারদের কাছে পৌঁছে দেওয়ার নির্দেশ দেওয়া হয়েছে।

\*\*\*\*\*

### **Drone in Agriculture :**

খোয়াই জেলা জুড়ে কৃষি কাজে ড্রোন ব্যবহারের চাহিদা দিন দিন বৃদ্ধি পাচ্ছে। আজ কৃষি কাজে স্যার ও কীটনাশক প্রয়োগের ক্ষেত্রে এগ্রি ড্রোনের কোন বিকল্প নেই। হাত মেশিনের সাহায্যে কৃষি জমিতে কীটনাশক প্রয়োগ ধীরে ধীরে বন্ধ হতে যাচ্ছে। খোয়াই দিব্যোদয় কৃষি বিজ্ঞান কেন্দ্রের বিষয়বস্তু বিশেষজ্ঞ তথা চারা গাছের সুরক্ষা বিজ্ঞানী ডঃ অর্ধেন্দু চক্রবর্তী খোয়াই জেলার আকাশবাণী প্রতিনিধিকে জানিয়েছেন, কেন্দ্রীয় সরকার রাজ্যের মধ্যে মাত্র একটি বড় আকারের ও আধুনিক প্রযুক্তিতে তৈরি কৃষি ড্রোন প্রদান করেছিলেন খোয়াই দিব্যোদয় কৃষি বিজ্ঞান কেন্দ্রকে। এই ড্রোনটির মূল্য ৯ লক্ষ টাকা। এই ড্রোন প্রদানের উদ্দেশ্য ছিল কৃষকদের কৃষিকাজে সহায়তা করা। সম্প্রতি কৃষকদের আবেদন অনুসারে কেভিকে খোয়াই মাত্র ৮ মিনিটে দুই কানি কৃষি জমির ফসলে কীটনাশক প্রয়োগ এবং সার প্রয়োগ করে দিচ্ছে খুব কম খরচে। যার ফলে কৃষকরা স্বল্প খরচে সার ও কীটনাশক প্রয়োগ করতে পারছেন তাদের কৃষি জমির ফসলে। ফলে খোয়াই জেলার কৃষকরা উপকৃত হচ্ছেন।

\*\*\*\*\*

### **Brown Sugar :**

টাকার জলা থানাধীন নব শান্তিগঞ্জ এলাকা থেকে পুলিশ আজ ১২০ গ্রাম ব্রাউন সুগার আটক করেছে। পুলিশ সূত্রে জানা যায় নব শান্তিগঞ্জ এলাকার জনৈক ব্যক্তির বাড়িতে গোপন সূত্রে তল্লাশি চালিয়ে ২৯২টি ব্রাউন সুগারের ছোট ছোট কৌটা এবং ২২ হাজার টাকা আটক করা হয়। ঐ ব্যক্তির বিরুদ্ধে একটি এন ডিপিএস মামলা গ্রহণ করা হয়।

\*\*\*\*\*

### **Awareness programme :**

স্কুলস্তরের ছাত্রছাত্রীদের নেশার ক্ষতিকারক দিকগুলো সম্পর্কে অবহিত করে নেশার কবল থেকে সমাজকে মুক্ত করার লক্ষ্যে দক্ষিণ জেলা স্বাস্থ্য ও পরিবার কল্যাণ সমিতির উদ্যোগে আজ দেবদারু দ্বাদশ স্কুলে এক সচেতনতা সভা অনুষ্ঠিত হয়। সভায় অসংক্রমিত রোগ নিয়ন্ত্রণ বিভাগের দক্ষিণ জেলার নোডাল অফিসার ডা: অলক দাস, স্কুলের প্রধান শিক্ষক ফিরঞ্জন ত্রিপুরা, জাতীয় স্বাস্থ্য মিশন প্রকল্পের দক্ষিণ জেলার মিডিয়া এক্সপার্ট মানস চক্রবর্তী প্রমুখ ছাত্রছাত্রীদের সামনে সচেতনতামূলক বক্তব্য রাখেন।

\*\*\*\*\*

### **Workshop :**

কৈলাশহরের ঊনকোটি কলাক্ষেত্রে আজ বিদ্যালয় শিক্ষা দপ্তরের উদ্যোগে "ইউনিফাইড ডিষ্ট্রিক্ট ইনফরমেশন সিস্টেম ফর এডুকেশন" বা U-DISE বিষয়ক এক কর্মশালা অনুষ্ঠিত হয়।

ঊনকোটি জেলার সব নিম্ন বুনিয়াদি, উচ্চ বুনিয়াদি, মাধ্যমিক, উচ্চ-মাধ্যমিক ও মাদ্রাসার প্রধান শিক্ষক, প্রধান শিক্ষিকা ও ভারপ্রাপ্ত শিক্ষক-শিক্ষিকারা এতে অংশ নেন। শিক্ষা প্রতিষ্ঠানগুলির ছাত্র-ছাত্রী, শিক্ষক-শিক্ষিকা, পরিকাঠামোগত অবস্থান সহ সব ধরনের তথ্য অনলাইন পোর্টালের মাধ্যমে নথীভুক্তকরণের বিষয়ে এখানে প্রশিক্ষণ দেওয়া হয়। এই পোর্টালটি গোটা দেশেই প্রযোজ্য। এটি শিক্ষাব্যবস্থার তথ্য ব্যবস্থাপনা। সময়মতো ও পর্যাপ্ত তথ্য সন্নিবেশ করার মধ্য দিয়ে শিক্ষাক্ষেত্রে উপযুক্ত সিদ্ধান্তগ্রহণ এতে করা হয়। ঊনকোটি জেলার জেলা শিক্ষা আধিকারিক প্রশান্ত কিলিকদার জানান, আগামী ৩১ শে মে'র মধ্যে স্কুল ও মাদ্রাসাগুলির শিক্ষার্থী বিষয়ক তথ্য আপলোড করা হবে। এই লক্ষ্যপূরণে এধরনের প্রশিক্ষণ কর্মসূচির আয়োজন।

\*\*\*\*\*

#### **BJP-Press Meet :**

প্রদেশ বিজেপি মুখপাত্র সুব্রত চক্রবর্তী আজ আগরতলায় এক সাংবাদিক সম্মেলনে অভিযোগ করেন সম্প্রতি সিপিআইএম-এর নেতৃবৃন্দ রাজ্য সরকারের কাজকর্ম নিয়ে বিভ্রান্তিমূলক প্রচার করছে। এর প্রতিবাদে বিজেপি'র উদ্যোগে আগামী ১৮ই মে সারা রাজ্যে প্রতিবাদ মিছিল সংঘটিত করা হবে। সাংবাদিক সম্মেলনে অন্যান্যদের মধ্যে উপস্থিত ছিলেন বিজেপি দলের সাধারণ সম্পাদক তাপস মজুমদার ও মিডিয়া ইনচার্জ সুনীত সরকার।

\*\*\*\*\*

#### **DYF SFI agitation :**

সি.বি.এস.সি পরিচালিত দ্বাদশ ও দশম শ্রেণীর চূড়ান্ত পরীক্ষায় রাজ্যের বিদ্যাজ্যোতি স্কুলগুলির ফলাফল ভালো হয়নি বলে অভিযোগ এনে ভারতের ছাত্র ফেডারেশন ও উপজাতি ছাত্র ইউনিয়ন আজ আগরতলায় শিক্ষাভবনের সামনে বিক্ষোভ প্রদর্শন করে। এই বিক্ষোভে উপস্থিত ছিলেন এসএফআই রাজ্য সভাপতি সুলেমান আলি, রাজ্য সম্পাদক সন্দীপন দেব, টিএসইউর সভাপতি নেতাজী দেববর্মা, সাধারণ সম্পাদক সুজিত ত্রিপুরা প্রমুখ।

\*\*\*\*\*

#### **kidnapped girl Rescued :**

খোয়াইয়ের পশ্চিম সিঙ্গিছড়া থেকে অপহৃত এক নাবালিকাকে পুলিশ গতকাল রাজস্থান থেকে উদ্ধার করেছে। এইসঙ্গে অশোক কুমার চৌধুরী নামে এক অপহরণকারীকেও পুলিশ গ্রেপ্তার করেছে। অপহরণের ঘটনাটি ঘটে গত ৬ই মে। খোয়াই মহিলা থানার ওসি মিনা দেববর্মা আজ এখবর জানিয়েছেন।

\*\*\*\*\*

#### **Inter: School Cricket :**

সদরের আন্তঃ স্কুল ক্রিকেট প্রতিযোগিতার আজ অনুষ্ঠিত চারটি খেলায় আনন্দনগর স্কুল, নন্দননগর স্কুল, হেনরি ডিরোজিও স্কুল ও প্রগতি বিদ্যাভবন জয়লাভ করেছে। নরসিংগড়ের পঞ্চায়েত মাঠে অনুষ্ঠিত সকালের খেলায় আনন্দনগর স্কুল ৩৮ রানে রামঠাকুর পাঠশালাকে এবং একই মাঠে দুপুরের খেলায় হেনরি ডিরোজিও স্কুল ৬ উইকেটে নেতাজী সুভাষ বিদ্যানিকেতনকে পরাজিত করে। এদিকে, তালতলা মাঠে সকালের খেলায়

নন্দননগর স্কুল ১১০ রানে প্রাচ্যভারতী স্কুলকে এবং পরে দুপুরে একই মাঠে প্রগতি বিদ্যাভবন ৪৮ রানে শিশু বিহার স্কুলকে হারিয়ে দেয়।

\*\*\*\*\*

**Inter School Boy's Cricket Tournament  
Santirbazar :**

শান্তিরবাজার ক্রিকেট এসোসিয়েশন আয়োজিত আন্তঃ স্কুল ক্রিকেট টুর্নামেন্টর আজকের ম্যাচে বৃন্তক শিক্ষানিকেতনকে ৯ উইকেটে হারাল জোলাইবাড়ি দ্বাদশ স্কুল। বাইখোড়া মাঠে টসে জিতে প্রথমে ব্যাট করতে নেমে বৃন্তক শিক্ষানিকেতন। ১০ ওভার ৫ বলে সবকটি উইকেট হারিয়ে ৩৬ রান সংগ্রহ করে। জবাবে জোলাইবাড়ি দ্বাদশ স্কুল ৩ ওভার ১ বলে ১ উইকেট হারিয়ে জয়ের প্রয়োজনীয় রান তুলে নেয়।

\*\*\*\*\*

**Weather :**

আগামী চব্বিশ ঘণ্টায় রাজ্যের সব জেলায় গরম এবং বাতাসে আর্দ্রতার পরিমাণ বৃদ্ধি অব্যাহত রয়েছে আজকের সর্বোচ্চ তাপমাত্রা আটত্রিশ দশমিক এক ডিগ্রী সেলসিয়াস এবং সর্বনিম্ন তাপমাত্রা সাতাশ দশমিক সাত ডিগ্রী সেলসিয়াস। আগামীকাল তাপমাত্রা সর্বোচ্চ সাঁইত্রিশ ডিগ্রি এবং সর্বনিম্ন আঠাশ ডিগ্রী সেলসিয়াস এর কাছাকাছি থাকবে। এই মরশুমে দ্বিতীয় বার তাপমাত্রা আটত্রিশ ডিগ্রীর উপরে উঠেছে।

\*\*\*\*\*